

գանայ բարեպաշտի լեալ, և այսմ վկայ օրէնքն՝ զոր եղ Վաչա-
գան արքայ ամենայն եպիսկոպոսօքն Աղուանից, և գրէ այսպէս.
«Ես Վաչագան արքայ Աղուանից, և Շուփհաղիշոյ արքեպիսկո-
պոս Պարտաւայ»։ և յետ այսորիկ այս անուռն ո՛չ գտանի ի կարգ
համարոյ եպիսկոպոսացն, ալ մեք սապէս և գտաք եղաք։ Եւ
սպա տէր Մատթէ, տէր Սահակ, տէր Մովսէս, տէր Պանտ, տէր
Ղազար։ Եւ ապա սուրբն Մանուկն Գրիգորիս, որդի մեծին Վրբ-
թանայ, եղբայր Յուսկանն, թոռն սրբոյն Գրիգորի զոր առաքեաց
մեծ արքայն Հայոց Տրդատ, և սպանեալ եղեւ ի դաշտին Վատնայ
վասն վկայութեան Աստուծոյ, և բերեալ թաղեցաւ յԱմարաս։
Յետոյ նշխարքն գտեալ եղեւ յաւուրս Վաչագանայ, ընդ որս և
նշխարք սրբոյն Զաքարիայի հօրն Յովհաննու Մկրտչի, և Պան-
դալէիմոնի մեծ վկային Քրիստոսի, որ վկայեաց ի Նիկամիդիա քա-
ղաքի յաւուրս Մաքսիմիանոսի, զոր տարեալ էր սուրբն Գրիգորիս
ընդ իւր։ Եւ ապա տէր Զաքարիայ, տասն՝ տէր Դաւիթ, մետա-
սան՝ տէր Յովհան, որ և Հոնացն եղեւ եպիսկոպոս, երկոտասան՝
տէր Երեմիայ, յաւուրս սորա արար Մեսրօպ գիրս Աղուանից մե-
ծաւ Զանիւ. երեքտասան՝ Տէր Աբաս։ Առ սա գրեցին ի ժողովոյն
Դվնայ՝ ասել զսորբն Աստուած, անմահ և խաչեցար, և ասել՝ մի
բնութիւն Աստուածութեան և Մարդկութեանն, չորեքտասան՝
տէր Վիրոյ ամս երեսուն երեք։ Սա զբազում ամս ի դիպահոջ լեալ
ի դրան Խոսրովու Պարսից արքայի, և յետ մահուան նորա ազա-
տեալ, եկն յերկիր իւր։ Սա թափեաց զգէրեալսն Հայոց՝ Վրաց և
Աղուանից ի Շաթախագրէ, յորդոյն Զբուխաքանայ, որ գերեաց
զաշխարհս։ Սա շինեաց քաղաքս հինգ յանուն Շաթայ՝ զՇաթաւ,
զՇամբուռ, զՇաքի, զՇրուան, զՇամախի, զՇապօրան։ Տէր Զա-
քարիա ամս հնգետասան։ Սա աղօթիւք իւրովք ապրեցոյց զմեծ
քաղաքն Պարտաւ ի գերութենէ։ Տէր Յօնան՝ ամս քսան և հինգ,
տէր Ուխտանէս՝ ամս երկոտասան։ Սա անէծ զնախարարս Աղուա-
նից վասն ազգաշաղախ խառնութեան, և սատակեցան ամենեքեան։
Տէր Եղիազար՝ ամս վեց, տէր Ներսէս՝ ամս եօթն և տասն։ Սա
մինչ եպիսկոպոս էր Գարդմանայ՝ հաւանեցոյց զկին ոմն Սպրամ
անուն, կին իշխանին Աղուանից՝ զի զամենայն ինչ ըստ կամաց
նորա գործեսցէ. և էր կինն խմորեալ յաղանդն Քաղքեգոնի, և